

OLA

PULETINI A'OGA




Samoa i le Tala Faasolo



Faasoa o le Vaiaso

27 NOVEMA 2017 ~ Lomiga 37 ~ Upega Tafailagi: www.ola888.com ~ Telefoni (03) 382 6674 ~ Tuatusi: ola.niupac@gmail.com; ~ evaleon.books@gmail.com ~ E le faatauina ~ A Free Publication

'SEI ORIANA' I MAGELE



O se tasi tusi a le EVALEON e fesoasoani i le a'oina o le Kalama Samoa. E tolu tusi i le ulutala—Lau Amata, e su'esu'e ai e le fanau vaegamea amata e tu ai le Gagana Samoa. Maua i le Sei Oriana SSAB i le aai faatau a Magele, Aukilani. E mafai ona e asiasi i le upega tafailagi a le Sei Oriana.



E LEAI SE TULAFONO O LE NAUNAU I LE A'OA'OINA: Kimani Maruge, 84 tausaga o Kenya, o le tama a'oga aupito matua a le lalolagi. O lana vasega o tamaiti e ta'i 6 i le 7 tausaga. Sa te'ena lona ulufale ona ua matua tele ae le mafai le usu mai pea i le taeao ma lana ato a'oga. Ma sui ai le mafaufau o le faia'oga. O Kimani sa auai i le vaega fouvale a le Mau Mau, leai se taimi e alu ai i le a'oga a o laitiiti, lea faato'ā maua le avanoa. E iai se ata tifaga faaosofia i lona tala o lona olaga.

Fai mai isi e vave amata poo le 4, fai mai le malo faatali se'i atoa le 5. O isi o le 7. O le a sou taofi?

O le a le matua e tatau ona ulufale ai fanau i le a'oga?

Ou te lagolagoina le faato'ā faaulu o le tamaitiiti i le 5 tausaga.

O le taimi tonu lena ua fetau ma le mautu o ona tomai mai le a'oga amata.



Tupa'i N. Enosa

A vave ulufale e tele ai galuega a faia'oga, ma le isi mea e faigata foi mo le fanau galuega.

O taimi ia e fiafia tamaiti e ta'a'alo i fafo, e telē foi la latou a'oga e maua mai ai.

Ne'i faapea o le ta'alo e le se a'oga ae leai. O le si'osi'omaga i fafo o se falea'oga mo fanau laiti.

Ou te matuā lagolagoina polokalame amata e fa'aaoga ai le faaSamoa ma sauni atu ai le fanau e ulufale i le a'oga a le malo. E tele a tatou taaloga e fa'aaoga ai le gagana.

Ia o faatasi lena ma le naunau o le faia'oga e faatino le tiute.

Ou te 'au i le 5 tausaga.

Ou te tautala lava a'u i la'u fanau ma le auala na faafailele mai ai. Muamua lava i le a'oga



Salā Vailepa Letiu

faamasani e a'o

ai tomai i le va ma isi tamaiti. E taua lea auā a le masani fanau e galulue ma isi e fai lea ma faalavelave pe a amata le a'oga.

E ulufale atu la i le a'oga ua masani ma faapea ona faigofie ai le galuega a le faia'oga.

Ua laitiiti tele le 4, ae lelei le 5. O nisi foi tamaiti e umi lava se taimi o tau faamasani i le potua'oga. A o le aogā lena o ofaga amata e faamasani ai.

E iai foi aiga e iai matua o matua, o faia'oga sili na mo fanau, e le alu ai se tupe a le malo.

O la'u lava tilotilo i le mataupu e le faigofie.

Manatua o tatou lava ia e atoa loa le 5 tausaga alu loa i le a'oga.

Ae tusa i su'esu'ega a le aupopoto ua fai si

vave tele; o taimi na o loo fiafia tamaiti e eva ma tafafao ma fai a latou sailiga e fia iloa lea mea ma lea mea i le togalaau. E fiafia e faagaoioi.

O le mea lena e faigata ai ona faatonu tamaiti leaga o la e laiti, ae fiafia lava latou e ta'a'alo, ae ita ai le faia'oga e le fia ta'alo.

Ae lelei le faatali se'i atoa le 7 poo le 8 tausaga ona alu atu lea ua matua le mafaufau. Taimi lea ua le lavā ta'alo ae sauni e fai lana meaa'oga.

O so'u manatu lena e tusa ma lau fesili. Ou te 'au i le 7.



Fili Fuaava

Ripoti o le Vaiaso

Saili se leo o matua a Linwood mo le fuafuaga 2018



Tamaitai Pule Amy Collins, Kolotita Fanene, Fogalele Fanene, Saili Aukuso

Sa maua le avanoa e faatasi atu ai i le fonotaga a matua Pasefika i le A'oga a Linwood North i le pitonuu o Linwood i Kalaiesetete.

E faafetaia le susuga a le tamaitai Sui Pule o Amy Collins mo le valaaulia.

O le auga tonu o le fonotaga o le fia iloa o mana'oga o matua, o latou faamoemoega, ma ni miti e ala i a'oga a le fanau.

O so latou manatu e taosoina ai se tapenaga a le pulega mo lana savaliga i le tausaga fou pe a aulia atu.

O nisi o tina talavou Samoa sa auai, o se auuso. O Fogalele Fanene ma

Kolokita Fanene. E a'o'oga o la alo i le A'oga a Linwood North.

Ma o se avanoa lelei e tapa ai loa so la finagalo o ni tina tautua a'oga i le fanau.

O Fogalele sa fanau i Niu Sila ae e lelei tele lana tautala i le faaSamoa ma le faaPeretania. Sa faafilele mai lona ola a'oa'oina i le Autaumafai A'oga Amata a le latou Ekalesia, St Paul's Trinity Pacific i Kalaiesetete lava.

O lona faanaunauga ia maua e fanau le lagolago i polokalame e faatino ai tu ma aga faaPasefika. Ia lelei ma lava tapena faia'oga i le faatinoga o polokalame i le tusitusi ma le faitautusi

aemaise o le Numera ina ia siitia ausiga a fanau Pasefika i Linwood North.

E taua le femalamalama'i o le pulega a le a'oga ma matua Pasefika i o latou mana'oga, saunoa Fogalele. O le sootaga ma matua e fia faalelei atili, ia faigofie ona fesoota'i i taimi uma.

O Kolotita e taua foi lana faasoia mai. Ta'utino e ia ua tau galo lana faaSamoa ae o loo naunau e tautatala si ana fanau i le gagana Samoa. O lea e tatau ai ona faalelei ia ina ina mafai ona fesoasoani i le fanau i le fale.

O le manatu laualuga o le auuso ia fai se polokalame e a'oa'oa ai le Gagana Samoa i totonu o le a'oga. O le a manaia lea faiga e a'o'oga faatasi ai le fanau ma o latou matua.

Sa faafetaia e i laua le lagolago malosi a si o laua tina o l'uvale Fanene i le faamalosi o i latou ma a latou fanau e fa'aaoga le Gagana i totonu o si o latou aiga.

E lagolagoina foi e le tamaitai pule o Amy Collins sea lagona. O ia e talitonu i le taua o le gagana muamua a fanau i lo latou ola a'oa'oina.

O le a faao'atu lagona o matua i le fonu a le Komiti Faafoe i se taimi, e fuafua i ai se tapenaga a le pulega mo le tausaga fou, 2018.

Saili Aukuso

Faamau se suafa Samoa i le tala o le faailoga Rae Munro

E le uma le mau tala fiafia i ausiga a tama fanau Samoa i le faiva.

O le vaiaso ua tuana'i na ausia ai se tasi foi matati'a mo le igoa Samoa, ina ua maua e le alii faia'oga ia Lealiiee Tufulasi Taleni le faailoga a le NZARE, ta'ua le faailoga lenei o le Rae Munro Award.

E ofoina atu e le NZARE, o le asosi a tagata su'esu'e a Niu Sila.

O aiaiga o lona ofoina atu e aofia ai lona tulaga maualuga i le tapenaga; na maua e Lealiiee le togi A+ mo lana galuega. E manatu foi le komiti o le a aoga lana autu i le galuega sutesue tau i lea mataupu.

O lana autu, E maua lava i tautai se agavaa. O mea tau le ta'ita'iga. E to'afa ni pule a'oga sa su'esu'eina.

E to'alua i laua sa tauva, lea ua maua e Taleni mo le iunivesite a Kenetaperi, o ia foi le ulua'i Samoa



Malo afua malo ua maua: Lealiiee ma Dr Fuapepe Rimoni sa auai foi i lenei sauniga i le vaiaso ua te'a

ma se Pasefika ua maua le faailoga.

E iai foi le faailoga mo le tikeri lona tolu (PhD) e ta'ua o le Sutton-Smith. Na maua e le tamaitai o Rae Siilata o Aukilani

i le 2015. O ia le uluai Pasefika i lea foi tausinioga. Sa faia lenei sauniga i le lotoa a'oga a Waikato. Sa auai ni sui o le aiga o le alii manumalo i le faamoemoe.

Faaso o le Vaiaso

O le a se lalolagi tatou te tuua mo le fanau?

O le vaiaso na se'i mavae na faailoga ai e le lalolagi le Aso o Tamaiti. Pe ua fitu ai nei tausaga talu lona faamamalu; o se tala fiafia o lea foi ua aloa'ia lona tausiga e Samoa. Manatua na mua Samoa i lana Lotu a Tamaiti.

I le liuliuga o le tofa ma le faautaga a ta'ita'i o le lalolagi, ina ua tuana'i ni seneturi se tele o aafiaga o fanau ona o faaiuga a le aumatutua, ua matuā onomea ai le togia o se aso.

Muamua, e faailoa nisi o mataupu ogaoga o loo afaina ai i latou, ma taumafai e saili ni tali mautu i ala o fonotaga taualoa faavaomalo.

Fai mai le faamau a le UN e 215 miliona tamaiti o loo faafaigaluega ae le o i le a'oga. E to'atele e maua i atunuu tau atia'e ma na e maulalo le atina'e; o le to'atele e galulue mai le taeao i le afiafi mo ni totogi faatauva.

O nei fanau e le tofo i le olaga faatama ma teine laiti. E lavea latou i le ta'u o fanau o le pologa. Poo se 'afa o lena e fesaga'i ma sauaga i le tino, mafaufau ma le loto.

E iai le upega a le antislavery e maua i ai le lisi o auala e faapologa ai fanau— Ft. e saili ai tupe faasili a nisi e ala i lo latou malos i galuega, i pisinisi e iai le talitane, faatau atu o vailaau faasāina, pe tutuli e gaioi pe aisi tupe i magaala.

O le fesili, Aisea e faamalosi ai fanau e faigaluega? E mafua i le mativa o matua ma aiga. Pe le lava le totogi o le tamā poo le tina ona tuli faamalosi lea o le tama 8 tausaga e faigaluega e fesoasoani. Ae fiafia foi pule o galuega e faafaigaluega tamaiti auā e le taliupu i le pule, e oole gofie i nai totogi.

I nisi vaega o le lalolagi, e le mafai e matua ona totogi a'oga a le fanau, e leai foi se fesoasoani mai le malo. Pau le filifiliga o le alu e su'e se galuega. Ae le o so latou loto lea. Ona omia ai lea i lona olaga atoa i le na o sina tau faatauva. A le o lena o le alu loa e auai i le vaega a le Isis.

Ae le ta'ua isi mau auala o loo faapologaina ai fanau a le lalolagi. Lena e afua mai i aganuu ma lotu a tagata. A faamalosi ona faafaipoipo se teine laitiiti 10 tausaga i se toeaina 70 e le faigata ona fai se faamasinoga o le sese ma le sa'o, pe i se tasi upu, le tu ma le aga ua tatau ona lafoa'i i le lapisi.



O le upu moni e le maua taeao ni tali o nei faafitauli, ae maua lava pe a fesili le tagata ia lava, i le filemu toto'a e pulea e lona lotofuatiaifo. Amata mai i sē aupito paoā i le lalolagi, Trump ma le vaega, e aulia se tamā talavou tausai aiga. O le a se lalolagi ou te mana'o e tuu mo lo'u atalii ma le afafine pe a uma lo'u taimi?

E le tali atu Trump i le faamata'u tuga a le tau e ala i lona mamalu ma le 'oa e tele. Auā e le feagai lana pule ma le pule faalenatura pe a faatau o la faalii.

E le faatauina i ni tupe le ola fiafia o sona alo ataeao ma tupulaga lalovaoa a le lalolagi e puleesea i sana faaiuga.

O a ni mea lelei ua fai e o tatou ta'ita'i mo fanau? O se fesili e ao ona tatou faamasinoina ai ni o tatou ta'ita'i e ta'ita'iina o tatou malo ma nuu. Ae tusi foi lo'u lima ia te a'u. O le a sa'u mea na fai—pe ao ona fai—e siitia ai le tulaga mo fanau, aiga, a'oga poo la'u aganuu foi?

Ua lava ma totoe molimau e faamaonia ai le mole o le lalolagi ona o le ea oona ua fusia nei pei se ieafu mafanafana. E sosoo le mafanafana ma le mu. O le faamata'u sili lea.

Ua tau mai luma tau mai tua faafitauli o loo feagai ma le fanau a tagata i lenei lava taimi. Fa'i o le itu faalenuu ma faaleaganuu, a o le itu faigata o upufai faaletamoaiga, ua faapea ona tatou omia uma ai i vainifo o le uili.

E tasi le feau malos na atagia i lauga a usufono uma i Niu loka i lena vaiaso e faapea, aua nei manatu se malo poo se tasi e malaese ia mai mafatiaga o isi; e tasi a le vaa o loo tatou asu liu uma ai. A mama ua tupu le faalavelave.

O la latou tatalo ia faaoo atu le fe'au ma lona tuga i fanau i potua'oga ma soo se avanoa e mafai ai. O i latou nei o ta'ita'i o le lalolagi ataeao, e mafai ona tula'i mai o ni tautai manafanafa o lo tatou vaa.

“mafaua o le vaiaso”

O le olaga o se faia'oga faamalie gatā i se potua'oga e leai se faitoto'a.

Tulimanu o Pola Vai

E manatua le tautua a le Best Pacific ma moge o aso fiafia



E mua lava mea i Matautusa auā le agalelei fai pea o lo tatou Matai Sili. Ua toe o ni aso sola atu lenei foi masina, malo le faatoatoa.

E momomo le loto i le tilotilo atu i le patua o si atalii lea e tuu mai lona ata. E ta'u mai e le ata le tulaga o fanau o iai i le vasega lea. E leai ni o latou foliga, ua na o se numera i le faitau atoa. Sa tatau ona saofa'i lelei i se nofoa i se potua'oga ae le i le palapala i le aso atoa.

Ia, tamaiti, a e tagi soo i le le faataua e tina o sau sukalati ona e tilotilo lea i le ata, e maua ai sau lesona aogā i le olaga.

O se tala faanoanoa foi le tulaga ua aliali mai i le Best Pacific i Aukilani. E to'atele e fesoata'i i ai, pe sa a'oga ai pe sa a'oa'oina ai foi nisi o le fanau. Pe a ma se 30 tausaga o le tautua a le Best. Iai nai uso faia'oga e masani ai. E to'atele fanau a le Pasefika na ui atu i le Best ua faigaluega, iu manuia foi taumafai o isi i iunivesite sa ui atu i le Best.

Ia, talosia le lumana'i, fanau, susuga i faia'oga ma le aufaigaluega uma; ia mau pea le talitonu e toe oso foi le la. O le upu, e tatala e le Alii le isi auala pe a tapuni auala a tagata.

Ana mafai ona toe ki le taimi i tua ou te alu e su'e so'u tusi i le faifaatoaga. A o aga'i ina sui aga i soo se vaega o le soifuaga, ua tula'i mai le faifaato'aga o se tasi faiva alumia. Fai la'u tala o lo tatou si'osi'omaga i Samoa, le tele o fanua e lei faato'aina, le anoano o fua o faato'aga e mafai ona maketiina. Ae mana'omia ni saienitisi latou te taiuluina ni su'esu'ega.

Fai mai Pole e sili ia le ave o tupe e faatupe ai ni su'esu'ega i faato'aga ae malolo le lakapi mo se taimi. Ia, Pole, e le avea le fuamoia e tasi ma mea e te ita faasauatoa ai.

Faafefea ona faatusatusa le \$50,000 e maua e le tama Ausi i le taaloga e tasi ma nai alauni a nai a tatou tama ta'alo!


Lafo mai e se isi le ata o si tama Toga laitiiti ma lana melotagi ua faaleaogā e le laufali le siko. Ia, a fai ni faaiuga faapea a ni laufali i se taaloga faitaulia e vave lava le oso a'e o le moge faalii. O le faiga lava lenei o tatou e le toe uma.

Talofa i si uso tala'i e pei o le lipoti mai Samoa. O sina fagufagu i le aufaimalaga i le Kerisimasi; le moge oso pe a luagia, ona galo lea e le o motorway a Niu Sila ma Amerika o loo tatou eva ai. Leai. E tasi lava le ola. Ae aua ne'i afaina le ola o le isi ona o lo ta faatamala.

Ae talosia ia o tatou faamoemoega ia taunuu manuia viia le Tautai Sili.

O le tala mo le fanau laiti

O Laki le maile e laki



E laki le olaga o le tama'i maile o Laki. O se tamaloa faifaatoaga na faatauina o ia mai lona matai. Na te manatua lelei le aso ma le nofoaga.

O isi ona uso na faatau e se tamaloa su'e auro, na te mana'omia ni maile e tosoa lana taavale i le aisa.

I le fale o le faifaatoaga sa nofo ai Laki. O aso uma lava e moe ai o ia i tafatafa o le ta'igaafi pe a alu le faifaatoaga e fai ana galuega.

A fo'i mai o ia e fiafia e sii Laki i ona vae ma talanoa i ai. O mea 'ai lelei e taumafa ai le faifaatoaga e 'ai ai foi Laki.

Ina ua tau matua a'e ona alu lea o le faifaatoaga ma ave i le lotoā manu. E feiloa'i atu ai i mamoe ma povi ma solofanua ma le asini o Saulo.

E leai se isi o latou e le iloa lona igoa, 'Malo Laki. Amuia oe e te tausami lelei ma e moe lelei.'

Ae faapea foi le manatu o Laki, 'Amuia latou auā e nonofo faatasi ma o latou uso ma matua, a o ia ua leai ni ona uso ma ni matua.

'E sili le laki o latou i lo a'u', o sona manatu lea na o ia.

A o le tasi aso na ia iloa ai ua leai Saulo le asini i le lotoā. Ae iai se asini fou e igoa ia Siliva. O ia lea ua nofo i le potu sa nofo ai Saulo.

Ua fesilisili solo i isi poo fea Saulo. O la latou upu, O Saulo ua malolo.

Ua tele lona fia fesili i lona matai ae o le faalavelave e le malamalama i le gagana a manu.

O le mea na te le iloaina, e leai se mea e tumau. O ia ma le asini e faamoemoe i le alofa o le faifaatoaga.

E gata le aogā o le asini a o malosi, ae a oo ina matua ona uma lea o lona aogā mo se faifaatoaga. O povi ma mamoe e gata o latou aogā i le fafagaina o tagata. I o latou aano ma o latou suāsusu.

O aso uma lava e tupu sona lagona o ia le manu aupito laki i le olaga.

I le tasi Kerisimasi na sau ai le faifaatoaga ma se tama'i maile aulelei lava, na oso puna i luga i lona fiafia. Faapea a ia o lana meaalofa lea o le Kerisimasi. O le a atoa nei lona fiafia, o le a iai sana uo la te nonofo faatasi.

Ae na matuā taia lona fiafia ina ua sui mai foliga o le faifaatoaga. Ua togi o ia i se ponaivi ma tuli i fafo mai le fale.

O inā na ia iloa ai le mea moni tau i le olaga. E gata lou aogā a o e malosi. E pele oe mo se taimi ae le o aso uma.

Ua ia iloa nei ua uma lona taimi sa pele ai o ia i le faifaatoaga. Ua aga'i foi ina tausami gatā o ia ma tele ai tupe faaalu a lona matai.

E sili loa le vave alu ese a o maua le avanoa; e iai le fana a le tamaloa.

E le'i leva lana savali ae faasalāvei ane lana uo, o le luko e igoa ia Mole. O Mole e masani ona asiasi ane ma laua talanoa pe a na o ia le fale. Ua ia faamatatala atu i ai le mea ua tupu.

"Tagi fua, fia 'ai fua i sosisi a le tamaloa, o le mea sili o lena e te ola. Ae sau ta o, ou te iloa le mea e lelei mo oe."

Ua alu loa le solo a Laki ma lana uo o Mole, e lei leva ae taunuu i se vanu tele lava. Na la iloa atu ni maile e pei lava o Laki.

Ia, se tala fiafia foi tamaiti, o uso nei o Laki ua agaleagaina foi e le tamaloa sa tausiamia. O lea ua fai lo latou lava nuu i lea vaega o le vaomatua.

Ia, ona nonofo fiafia ai lea o Laki ma ona uso. Ua latou iloa e sili lava le aiga; pe 'ai si mea magumagu ae o loo ola sa'oloto. Ua moni le upu ia Laki, o se maile e laki, ae faapea foi ona uso, ua atoa lo latou aiga.

A oo i le po e feou leotetele i le lagi, ma fefefe ai le lalolagi o loo momoe. Ua le maua ai se moe lelei a le toaina faifaatoaga.


E lei uma le tala, tamaiti, ki mai pea lau laau i le OLA 888, i le vaiaso fou. E faasolo ina tau le ata.




O le tatalo a Sagato Faranisisi

Le Alii e,
avea a'u ma meafaigaluega
o lou filemu
i le mea o iai le inoino ia ou
totō ai le alofa;
i le mea o iai le tiga, le
faamagalalo;
i le mea o iai le le mautonu, le
faatuatua;
i le mea o iai le faavaivai,
le faamoemoe;
i le mea o iai le pouliuli,
le malamalama;
i le mea o iai le faanoanoa, le
olioli.

Le Matai Paia e,
Foa'i mai le agaga ou te le
soona sailia ai lo'u
faamafanafanaga, a ia
faamafanafana atu;
so'u faailoaga a ia iloa atu;
so'u alofagia a ia alofa atu;
Auā e auala i le ofoina atu
tatou te maua ai;
i le faamagalalo atu lo tatou
faamagaloga;
ma le oti tatou te maua ai le
ola e faavavau.
Amene.





O LE saili malo a Samoa i fafo atu poo le agaga e faavae ai se na sailiga le faapogai o ana ausiga e ala i ana tama fanau taape atu. A fua i le taimi o le tula'i mai o le uluai faigamalo a le Leipa ma le ausiga mata'ina o le 1999, ina ua ulufale ni faipule Samoa se to'afa i le Palemene, e maeu. Na o se 64 tausaga e va ai, ma o se taimi puupuu pe a manatu na faato'a to'ai o tatou tagata i le 1950. A faatulaga i pasene e iloga tatou pe a faatusatusa i nuu Asia e to'atele atu, tainane foi Maori, ua mafai ona ofi ni o latou sui i totonu o le palemene a Niu Sila. O le afioga ia Taito Philip Field na uluai asa le gasu i le auala masani e ui ai se tasi i upufai faaLeipa—i le iuni. E faapena foi mo Vui Mark Gosche o se sa taulamua i taupulega e tautuaina iuni; a o lei tauia lana tautua i le avea ma se sui a le Leipa i le lisi. O le afioga ia Anae Arthur Anae, e ese foi lona ala i malo, o se faipisinisi lausilafia i Aukilani; o ia sa ulua'i tofotofoina le tulaga fou ma fetala'i o upufai o le talutalufou (MMP), ma ulufale ai e ala i le National. Ma ia tatala le faitoto'a mo isi uso Samoa i lea vaega. E faapena foi le afioga ia Luamanuvao; o se tasi i le tupulaga muamua a Samoa soifua a'e i Niu Sila; ulua'i faipule tama'ita'i Pasefika e ulufale. I lona tulaga o se faia'oga ma se sui o faiganuu Pasefika Ueligitone na saunia ai o ia e ulufale i upufai e ala i le Leipa. Mo latou uma, o le agaga fia tautua i o tatou tagata ina ia faaleleia so tatou tulaga. Taimi nei o loo fa'aaau le tautua; Luamanuvao e ala i le matata o a'oga. Anae sa faaaau le tautua e ala i le Fono a Aukilani. Vui o le pule faatonu Vaka Tautua. E taumate pe toe ausia le matati'a o le 1999.

26 NOV—2 TES

- 26 NOV**
1931 Tatala se falemeli fou i Matafele Apia
- 1974 Maua se nofoaga i Mulifanua sa nofoia e tagata Lapita; 'au su'esu'e Amerika
- 27**
1957 Feiloa'i le paea'iga lona 4 palemene; tofi Luafatasaga Fofoga fetalai Amoa Tausilia ma ona sui
- 1972 Taunuu 'Pili' vaa a le Polenisia mai Manchester Egelani
- 1999 Palota a Niu Sila. Malo Leipa ma le Alliance. To'afa sui Samoa i le maota: Taito, Anae, Vui, ma Luamanuvao
- 28**
1918 Faatonu e Logan le motusia o le uaealesi ma Amerika Samoa

- 29**
1970 Taunuu i Samoa le asiasiga a Pope Paulo le VI
- 30**
1902 Uluai lomiga puletini lotu O le Fetuao a le Metotisi
- 1929 Avatu le fanoga o le Mau i le tupu o Egelani Siasosi V mo le faau'i atu o le manetete ia Egelani; 29 sui na sainia
- 2002 Malo David Tua ia Russel Chasteen, T2
- 01 TESEMA**
1875 Taunuu i Apia le manua o HMS Barracouta, fai se tonu o le mataupu ia Sitanipeka
- 1944 Faamau: 18 neivi, 13 malini, 82 ofisa Niu Sila i totonu o Upolu (Samoa)
- 02**
1918 Taunuu i Apia le vaa mai Ausetalia, Encounter, ma se 'au o foma'i e fesoasoani i le togafitia o e mama'i i le fulu

Novema i le Tala Faasolo o Niu Sila



- 27 Nov 1935.** Uluai faigamalo a le Leipa, palemia Michael Savage
- 28 Nov 1893.** Palota itupa o tamaitai mo le taimi muamua
- 30 Nov 1949.** Uluai faigamalo a le National, palemia Sidney Holland, mo le isi 29 tausaga

NIUPAC PUBLICATION

Email: evaleon.books@gmail.com
 Phone: (03) 382-6674
 Postal: 39 Basingstoke Street, Aranui, Christchurch 8061

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editors:

Levi Tavita ~ ltavita8@gmail.com
 Muliagatele V. Fetui ~ v.fetui@auuckland.ac.nz
 Saili Aukuso ~ saili.niupac@gmail.com

EVALEON BOOKS & NIUPAC PUBLISHING

Telefoni (03) 382-6674. Imeli: evaleon.books@gmail.com



Sponsors:

New Zealand Lottery Commission

Evaleon Books & Niupac Publishing

Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, year-books, brochures). E tautua fo'i i le fa'aliliuga o gagana, ma le tapenaina o ni tusi e fia lomina i so'o se sionara o fatuga.





PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA



Igoa: Sagato Faranisisi
Aso Fanau: 26 Novema 1182
Ausiga: se tasi iloga lona tala i le Faatuatuga Kerisiano i lona soifua, upu, ma faata'ita'iga
Fetu: Satiteri

E le na o le Katoliko Roma e iloa ai Sagato Faranisisi auā o lona ta'uta'ua ma le amana'ia e leai se tuaoi. E mafua lea i le aoao ma le faigofie o lana fe'au, aemaise o le tulaga ese o lona tala. Ua silafia e le to'atele. O se na tupu a'e i se aiga maumea, ae tosina i mafatiaga o le aumatitiva; na mafua ai ona ia teena le lalolagi o lona aiga ae talia lena o le soo maumausolo. O le tala i lona tapenaga faaleagaga e aofia ai se taimi i se falepuipui, ina ua taofia o se pagota o taua, afua ai sona liliuga i lena nofoaga. Fo'i mai fetau ma le lepela, ma sogi i ai, e pine le amataga o lana malaga i le ala o le mativa. Alu a'i i le muliauloa e nisi—alii ma tamaitai, e avea ma ona soo; sa latou faaa'oa'o i le olaga faigofie e pei o lena a Keriso ma ona soo e 12. Sa latou tautua atu i tagata puapuagatia e iai ma e mama'i i le lepela. E na o le 44 tausaga na soifua ai a o loo faamanatu pea lona soifua i se vasega i lona suafa. Na e'e atu o ia i le tulaga o le sagato i le 1228. Ua ta'ua foi o le sagato o le fanua manu ma tagata. O ia lava o le toa o le aumatitiva. O le failauga o manu o le fanua. O le pope o loo e'e nei o loo ia tauavea le suafa o le 'sagato mativa.'

www.ola888.com

ATI A'E UPU:

sagato (nauna) o se tagata ua ta'upaiaina e le Ekalesia Katoliko Roma. sagata—tamaitai. Soa Peretania—saint. sinoti (nauna) o se pulega faaekalesia iloa faatasi ma le Ekalesia Metotisi ma le Agelikana; se fonotaga tau i sea pulega; vaeveaga faaitumalo o le lotu e ta'ita'i ai le Sea. Soa Peretania—synod.

Otootoga

Sui tausaga e amata ai

Ua manino mai le faaaliga a le malo i le suiga. O le a le toe ulufale fanau i le faiga tuai lea e a'e ai i le amataga o le tausaga e lata i o latou aso fanau lona 5, ae o le a faatali se'ia atoa le 5 ona faato'a a'e lea. I le faiga tuai e mafai ai ona a'e se tama i lona 4 tausaga. E manatu le minisita ua vave tele lea mo le fanau. E taofi eseele le malo ma le itu agai i le mataupu.

Faitio se pule

Ua lelea atu i le 'ea le faitioga a le alii pule o le Otago Boys High i le le faia o tiute o matua. I lana matau ua lafo uma atu le avega i a'oga latou te faia ae nofonono matua ma omiomi a latou telefoni. O le avega i le amio ma le faatonuga sa tatau ona fai e latou e foliga ua faaee atu i a'oga latou te faia. E oo i ni mea e tutupu i fafo o le taimi a'oga ua faasino lima o matua i le a'oga ae malolo latou.

Taula'i faitioga i le numera

E oo i tamaiti aupito atamamai i le numera e auai i le faitioga ua faigata tele le su'ega o le Numera i le NCEA 1 i lena tausaga. Faatasi ma faia'oga o le Numera, o loo ua faaoo atu nei la latou faasea i le NZQA poo le vasega e saunia su'ega. E le o le taimi muamua lea ua tupu ai se faasea i le tapenaga o su'ega, ma saga tafuina le finauga i le uiga tonu e fai ai su'ega. E oo i faatonuga o mea e fai ua ova le faigata.

O se tala faanoanoa mo le Best

O se tala faanoanoa mo le aufaigaluega a le Best Pacific le faaaliga o le le toe fa'auauina o lana tautua. Ua le maua le vaega tupe sa masani ona latou maua mai le Komisi o A'oga Teseri (TEC). Sa masani ona maua le \$15.5 miliona a o sologa lelei le tautua. O le Best ua iloga lana tautua mo fanau a le Pasefika talu lona faavaeina. Ua tuua'iina le pa'u o le numera o fanau e ulufale, o le mafuaaga lea. E 150 le aofa'i o lana aufaigaluega o le a aafia a latou galuega.

POLE MA PAPA

